

# Carta rrucu nú uquie'e San Pablo lu bee bene eyeche Tesalónica enu nzeli arqui' Jesucristo

---

Lunú niarqui' Pablo nú cha  
nze'ca lu cuenda' bee bene

**1** Li'á Pablo, cuna Silvano nu Timoteo, rquie'eru carta quie' luhua, li'ihua bee bene Tesalónica enu nzeli arqui' Jesucristo, li'ihua enu neca tucunecatse cuna Diose Pa liñibe nu cuna Jesucristo enu rnibya'. <sup>2</sup>Nu Diose Pa'ahua cuna Jesucristo enu rnibya' ri'i nú cha nze'ca lu cuenda'hua cuna nú nzuxe arqui'hua.

## Rdete' Pablo che'tsa lu Diose

<sup>3</sup>Bee sa'a enu nzeli arquia'ahua Jesucristo ye ye'e rdete'ru che'tsa lu Diose equie cuenda'hua, xne scua riala nú ri'iru, xne ye ye'e másela nze chililá arqui'hua Jesucristo, nu le'ca cada tucuhua maselá secahua bee sa'hua. <sup>4</sup>Nu chiqui' ñia nzu arqui'ru rniru lu cuenda'hua ante lu beelá bee bene' Diose, nu rniru lubeella equie nú xa nzelí arqui'hua nu xa nzuquie arqui'hua añaiznzuca nú rri'inu bee bene li'ihua lunú rri'inu bee bene li'ihua, nu lunú nehuana secahua. <sup>5</sup>Nucua' rlube' nú

rlualu Diose tucu nú necane. Xne li'ihua bee enu nehuana seca riala nú ati'hua elu rnibya'nu.

<sup>6</sup>Nu lunú rlualu Diose tucu nú necane, enze'e ri'inu nú nehuana zeca bee bene enu rri'i nú nehuana secahua. <sup>7</sup>Nu li'ihua bee enu nehuana seca nee, liqui'nu nú tselachia'ahua bichia chenu riña zeca Jesucristo enu rnibya', nze'tanu enza liñibe leta ellie'nu nú xi neca quii neca cuna bee ángele'nu enu chiqui' rlu'cu poder. <sup>8</sup>Che dete'nu castiya bee bene enu la niarqui' chulu Diose nu cuna lubee bene enu lá niarqui' chili arqui' bedichia' nze'ca' Jesucristo enu rnibya' lua'ahua. <sup>9</sup>Bee benequie' zeca castiya nú leca xunga laxu, nu la yala cua'a beeí elu nzucu Diose xne chiqui' rnibya'nu. <sup>10</sup>Scua aca bichia chenu riña zeca Jesucristo enu rnibya' para nú lu'cu bee bene'nu ula'na lunu, nu zecalullie' ye beella lunu, nu le'ca li'ihua enu uyali arqui' stichia'nu nú uniru luhua.

<sup>11</sup>Enze'e ye ye'e rnacu'ru lu Diose equie cuenda'hua, nú ri'inu

elietsa luhua nú huañihua tucu nú rialane tucu nú ubixianu li'ihua nú huañihua. Nu le'ca rnacu'ru lunu nú ri'inu elietsa luhua cuna poder nú rlu'cunu nú yalu ye elliebacu' nze'ca nú rri'i hua, nu cuna ye beelá beenú rri'i hua, equie nú nzeli arqui' hua li'inu. <sup>12</sup>Nu scua zucu' ayahua Jesucristo enu rnibiya' lua'ahua nu li'inu zucu' ayanu li'ihua equie nú secanu li'ihua nu seca Diose li'ihua.

**Lube'lu tucu bene enu rlu'cu  
nú rnibiya' beze'lu**

**2** Nee bee sa'a enu nzeli arquia'ahua Jesucristo, equie cuenda' nú nze'ta zeca Jesucristo enu rnibiya' lua'ahua nu equie nú yete' sa'ahua cuna li'inu, nacua nu zequiaa luhua, <sup>2</sup>nú la zelahua nu chu zequieni bee bene li'ihua, li'ibeei enu rni nu uriñala bichia nu riña Jesucristo enu rnibiya!. La lliquihua chenu yene'hua nú rni bee bene scua,urre bee enu rni nú tucu espíritu uni lubeei scua,urre nibeei nú li'i e'curu uquie' eru tucu carta nú rni scua lubeei. <sup>3</sup>La zelahua nú ti zequieni li'ihua, xne ante nú riña bichia ze'e rluti riñaxu bee bichia nú la zucua' bee bene Stichia' Diose. Che lube'lu tucu bene enu ri'i puro nú rri'i beze'lu bene quie' necala nú cha ebila. <sup>4</sup>Bene quie' neca enu ri'i cundra ye lunú neca cuenda' Diose nu lu'cu bee bene ula'na lui, nu zucu' ayai li'i hasta nú zucui liñi indu' Diose, nu ni nú necai Diose.

<sup>5</sup>Ullu'cu arqui' hua nú scua unia luhua chenu uzucua'a cuna li'ihua. <sup>6</sup>Nu nee li'ihua nediyal'a' hua ti la zela nú chu lube'lu nucua' sino

que lube'lu nucua' hasta chenu riña bichia nu riala nú lube'lui. <sup>7</sup>Bee elliebacu' nú nechá neca cua' necalane lu iliulabe, rri'itsia nú zela enu la zela nú acane scua. Chenu uzelala enu la zela nú acane scua, <sup>8</sup>che lube'lu bene enu nechá rri'i cua', nu Jesucristo cuna bii nú laatsianu utinu li'i nu cuna ellie'nú nú nze'tanu nitilu li'i. <sup>9</sup>Bene enu necha rri'i cua', lu cuenda' beze'lu entai, nu chiqui' lu'cui nú nibiya'i. Nu ri'i huaxi bee nú zecalullie' bee bene, nu ri'i bee milagro para nú zequieni bee bene. <sup>10</sup>Cuna ye clasia' beenú necha neca zequieni bee bene enu unitilula ante Diose equie nú lá zela beeí nu lá niarqui' beeí chili arqui' beeí nú neli neca nú atsila'a li'ibeei. <sup>11</sup>Enze'e tsana' Diose nu ye bee nucua' zequieni li'ibeei, nú chili arqui' beeí lunú la neli neca. <sup>12</sup>Para nú ye beeí zeca beeí castiya, li'ibeei enu lá chili arqui' lunú neli neca, equie nú máse uyu' arqui' beeí uri'i beeí lunú nechá neca.

**Bee bene enu netsila'ala**

<sup>13</sup>Pero li'iru ye ye'e riala nú dete'ru che'tsa lu Diose equie cuenda' hua, bee sa'a enu chiqui' seca Jesucristo. Xne hasta hua'tu ucañila Diose li'ihua para nú tsila'ahua lu castiya lunú leca xi nahua equie cuenda' Espíritu Santo nu lunú uchili arqui' hua lunú neli neca. <sup>14</sup>Para nucua' ubixia Diose li'ihua nú acahua bee bene'nu, chenu uniru luhua bedichia' nze'ca' Jesucristo enu rnibiya' para nú huañihua liñibe elu nzucunu.

<sup>15</sup>Enze'e bee sa'a enu nzeli arquia'ahua Jesucristo utsuta'

arqui'hua uyanalahua lunú  
uzete'ru li'ihua chenu ullua'aru  
cuna li'ihua, nú lunú unilaru  
luhua lu carta. <sup>16</sup>Nu Jesucristo enu  
rnibiya' lua'ahua cuna Pa'ahua  
Diose enu seca lia'ahua nu rdu'nu  
ana arquia'ahua diqui tiembu  
enu uliqui' lua'ahua tucu nú neca  
nze'ca nzuculua'ahua, equie nú  
ñia nze'canu. <sup>17</sup>L'i'nu du'nu ana  
arqui'hua nu ri'inu elietsa luhua nú  
tsuta' arqui'hua nihua nu ri'ihua  
puro nú neca nze'ca.

#### **Na'cuhua lu Diose equie cuenda'ru**

**3** Nee bee sa'a enu nzeli  
arquia'ahua Jesucristo,  
una'cuhua lu Diose equie cuenda'ru  
para nú la le'e ri'chia letse stichia'  
Jesucristo diqui bee luhuare nu  
zucu' aya bee bene stichia'nú, tucu  
nú ungae letahua, <sup>2</sup>le'ca na'cuhua  
lu Diose para nú tsila'anu li'iru  
lu bee bene enu necha rri'i, nu  
lu bee bene enu necuchi nehuañi  
xne laca ye bee bene nzeli arqui'  
stichia' Jesucristo. <sup>3</sup>Pero Pa'ahua  
Diose siempre sa'alunu stichia'nú,  
li'inu ri'inu elietsa luhua nú tsuta'  
arqui'hua, nu acanu'nu li'ihua  
lu ye nú nechá neca. <sup>4</sup>Nu li'iru  
nediya' nze'ca'ru nú Pa'ahua Diose  
rri'inu elietsa luhua nú rri'ihua nu  
nzeri'iláhua lunú unilaru luhua.  
<sup>5</sup>Jesucristo ri'i elietsa luhua para  
nú chenalahua elu seca' Diose, nu  
ri'inu elietsa luhua nú riqui'hua lu  
ye beenú xi nze'ta zecahua tucu nú  
uriqui' Jesucristo.

#### **Rqui'ña nú ri'i bee bene riña'**

**6** Nee bee sa'a enu nzeli  
arquia'ahua Jesucristo, enu rnibiya'

lua'ahua equie cuenda' li'iu  
rnibiya'ru luhua nú chiu'uchuhua  
lu titse bee sa'ahua enu nebichiu  
la niarqui' ri'i riña' nu la nehuañi  
tucu nú uzete'ru li'ihua. <sup>7</sup>Xne  
li'ihua nediya'la'hua xa riala nú  
huañihua para nú huañihua tucu  
nú nehuañiru. Li'iru né allua'aru  
letahua sin nú ri'iru riña!. <sup>8</sup>Nu le'ca  
lecati eta' nú lia uda'curu sino que  
bichia si rula' uti'qui arqui'ru nu  
uri'iru riña' para nú la du'uru riña'  
luhua nú ari'ihua elietsa luru para  
nú huañiru, <sup>9</sup>la necane nú la yala  
nacu'ru nú ri'ihua elietsa luru sino  
que necane para nú ulube'ru luhua  
nú huañihua tucu nú nehuañiru.  
<sup>10</sup>Chenu ullua'aru cuna li'ihua  
uniru luhua: bene enu la niarqui'  
ri'i riña', le'ca la acu nze'e. <sup>11</sup>Pero  
nee ubene'ru nu nu' bee sa'hua  
enu nebichiu letahua nu la niarqui'  
ri'i riña' nu rdete' ru'u beella elu  
la yala dete' ru'u beella. <sup>12</sup>Equie  
cuenda' Jesucristo enu rnibiya'  
lua'ahua rniru nu rnibiya'ru lu bee  
bene cua' nú cua'axe beella nu  
zucu'lu beella nú ri'i beella riña'  
para nú huañi beella.

<sup>13</sup>Bee sa'a enu nzeli arquia'ahua  
Jesucristo, la llaca'hua nú rri'ihua nú  
neca nze'ca. <sup>14</sup>Tunu nu' tá tucuhua  
enu la zucu' lunú rniru lu carta quie',  
ubi'yahua ta nucua' nu la quiete'hualla  
para nú che tu'lla. <sup>15</sup>Pero la ri'ihua  
lulla xi rri'ihua lu bene enu rlehua lu  
sino que xi neca tucu bichihua uni'hua  
lulla nú ri'i nze'calla.

#### **Último bedichia' nú nequie lu carta quie'**

**16** Nu Pa'ahua Diose enu rliqui'  
nú nzux arquia'ahua, li'inu ri'inu

nú nzuxe arqui'huá ye bichia nu  
lu yeene. Nu Jesucristo nzu cuna  
yeehua.

<sup>17</sup>Li'á Pablo le'ca li'i e'cua rquie'a  
letra quie' para nú ri'á saludar

li'ihua, scua rri'á lu ye bee cartaa,  
scua rquie'a. <sup>18</sup>Nu Jesucristo enu  
rnibiya' ri'inu nú cha nze'ca lu  
cuenda' yehua.

Amén